

MBETJET E NGURTA URBANE

2025

Në vitin 2025, në Shqipëri u menaxhuan 900,8 mijë tonë mbetje, ose 4,5 % më shumë se një vit më parë. Mesatarisht, çdo banor gjeneroi 383 kg mbetje gjatë vitit, ose 23 kg më shumë se në vitin 2024.

Pesha e mbetjeve të ricikluara mbeti në rreth 18 %, pothuajse e pandryshuar nga viti 2024, ndërsa depozitimi në landfille vazhdon të jetë metoda kryesore e trajtimit. Gjithashtu, përbërja e mbetjeve urbane ka ruajtur pothuajse të njëjtën strukturë ndër vite.

Treguesit Kryesorë:

- 900,8 mijë tonë mbetje të menaxhuara;
- 383 kg mbetje për banor;
- 77 % e mbetjeve u depozituan në landfill;
- 18 % u ricikluan;
- 90,3 % e popullsisë u mbulua nga shërbimi i grumbullimit.

TAB. 1 MBETJET E MENAXHUARA GJITHSEJ DHE SIPAS KATEGORIVE, PËR BANOR REZIDENT 2023-2025

Viti	Gjithsej Mbetje	Menaxhuar Gjithsej	Mbetje jo urbane	Mbetje Urbane
	Tonë	kg/banor/vit	kg/banor/vit	kg/banor/vit
2023	844.157	351	36	315
2024	862.241	360	38	322
2025	900.782	383	42	341

Burimi: Bashkitë / Përpunimi INSTAT

*Të dhënat për mbetjet e menaxhuara për kg/ban në vitin 2025 janë llogaritur duke u bazuar në popullsinë mesatare vjetore të vitit 2025.

Shënim për përdoruesit:

Të dhënat e detajuara janë të disponueshme në databazën statistikore të INSTAT: [Vrojtimi vjetor mbi mbetjet e ngurta urbane](#)

Metodologjia

Që nga viti 2020, mbledhja e të dhënave bëhet në mënyrë elektronike, nëpërmjet pyetësorëve online të dërguar në të gjitha bashkitë e vendit. Ky proces përmirëson cilësinë, saktësinë dhe transparencën e statistikave vjetore mbi mbetjet urbane.

Informacioni mbi mbetjet e ngurta urbane në Shqipëri është vjetor dhe i përgjithësuar në shkallë vendi. Të dhënat e paraqitura në këtë publikim janë mbledhur nga bashkitë nëpërmjet pyetësorit elektronik të personelit që merret me menaxhimin e mbetjeve në bashkitë përkatëse.

Mbetjet e ngurta urbane, objekt i këtij publikimi, janë mbetjet e ngurta familjare dhe mbetjet e tjera të ngjashme me to, të cilat vijnë nga shërbimet komunitare ndaj popullatës në zonat e banuara, qoftë dhe përkohësisht. Statistikat e mbetjeve urbane u referohen treguesve statistikorë standard, sipas përcaktimeve në legjislacionin Shqiptar dhe atë evropian, duke implementuar të njëjtat klasifikime dhe përkufizime sipas rregulloreve përkatëse, *Programin e Statistikave Zyrtare të Shqipërisë në periudhën 2022 – 2026, Rregullorja e Komisionit Evropian Nr 2150/2002 mbi "Statistikat e mbetjeve"*.

Përkufizime

Mbetje të Ngurta Urbane: Çdo substancë ose objekt i ngurtë, që zotëruesi i tyre dëshiron ose është i detyruar ta hedhë. Kjo përfshin mbetjet familjare dhe të tjera të ngjashme, që gjenerohen në zona të banuara si pjesë e shërbimeve komunitare.

Mbetje të menaxhuara me fonde publike: Mbetje të cilat menaxhohen nga pushteti vendor dhe financohen nga buxheti i bashkive për banorët rezidentë në territorin administrativ të tyre.

Mbetje urbane: Pjesa e mbetjeve të ngurta që rrjedh nga familjet dhe shërbimet e përditshme komunitare (jo-industriale). Ato zakonisht mbledhen përmes sistemit publik të grumbullimit dhe përbëjnë shumicën e mbetjeve të menaxhuara.

Mbetje jo-urbane: Mbetje që nuk burojnë drejtpërdrejt nga familjet apo shërbimet komunitare, por që menaxhohen nga bashkitë së bashku me mbetjet urbane. Këtu mund të përfshihen mbetje nga aktivitete ekonomike, industriale, tregtare, ndërtimi apo burime të tjera të ngjashme.

Përbërja relative e mbetjeve: Tregon përqindjen e çdo kategorie materiali (si organike, plastike, letër etj.) përkundrejt totalit të mbetjeve të menaxhuara.

Trajtimi i mbetjeve: Përfshin mënyrat standarde të trajtimit të mbetjeve, si:

- Depozitimi në landfillë – hedhja në vende të autorizuara për mbetje.
- Djegia për energji – incinerimi për përfitim energjie.
- Djegia për eliminim – incinerimi pa përfitim energjie.
- Riciklimi – rikuperimi i materialeve për përdorim të mëtejshëm.
- Hedhje jashtë landfillit – mbetje të pakontrolluara ose jashtë sistemit të menaxhimit formal.

Kilogram për banor në vit: Njësi matëse që tregon sasinë mesatare të mbetjeve të gjeneruara nga çdo banor gjatë një viti.